

GRÆCIA.

GRÆCIA, quæ olim omnium bonarum disciplinarum tanquam mater & parens fuit, ex opulenta & diuitem Regione, suæque virtute magnæ parti Orbis dominante, eò hoc tempore redacta est (sic fors & tempus omnia versat) vt nihil reliquum relictum sit, quod non aut Turcarum iugo, aut Venetorum seruituti subiectum, ac tributarium factum sit. Turca maiorem partem occupat. Veneti in ea Insulas aliquot duntaxat possident. Qui sub Venetis sunt, meliorem habere conditionem videntur (quantum ad Religionem spectat) quam qui Turcis sunt subiecti. Et vt ij qui Turcis parent, illorum mores imitantur; sic, qui Venetis, eorum ritus sequuntur. Interim omnes in tantis ignorantie tenebris versantur, vt in tota Græcia nulla inueniatur Academia, nec etiam curant illorū pueros literas doceri. Omnes etiam indifferenter corruptam ab antiqua linguam loquuntur: sed alij alijs elegantius. tamen illorum lingua melius conuenit cum veteri Græca, quam Italarum cum Antiqua Latina. Qui Vrbes Venetorum Imperio subiectas habitant, tam Italicè quàm Græcè loquuntur: qui verò ruri degunt, nihil nisi Græcè. Qui Turcicas Ciuitates in ea incolunt, Turcicè & Græcè: sed qui pagos, Græcè tantum loqui sciunt. Habent etiam hoc sæculo, vt & olim, varia idiomatica vulgaria: nam vnius Prouinciæ homines melius, alterius verò deterius loquuntur: quamobrem illis accidit, quod in alijs Europæ partibus accidere videmus, vt pote, quod alter alterius ineptam (vt sibi quidem videtur) pronunciationem rideat, subsannetq; sic vt etiam pueri Constantinopoli nati, transmarinos derideant, ob accentuum varietatem, in quibus cum illis non conueniant, haud aliter, quàm Italus, qui Tuscanam; aut Gallus qui Gallicam; aut Hispanus, qui Castellana linguam proficitur, omnia cetera suæ Regionis idiomatica contemnit, exhibilatq;. Vt autem in genere describamus omnium incolarum viuendi morem, operæ precium visum est, Nobiles & Ciues à ceteris plebeis, infimæq; fortunæ hominibus discernere: nam quorum census est amplior, & in maiori existimatione haberi volunt, Principum, quorum Imperio subsunt, more vestiti conspiciuntur; ita vt qui sub Venetis degunt, Venetos; & qui Turcis parent, Turcos vestitu exprimunt. Sed cetera plebs sub cuiuscunq; ditione sit, tam in continenti quàm Insulis, aliquid suæ Antiquitatis hætenus retinet; nam pleriq; omnes comam ab occipite nutriunt, & à fronte sinciput tondent: vtunturq; magnis duplicibusq; pileis. Insulares in Religionis exercitio vtuntur omnes fermè eisdem ritibus, eademq; forma cæremoniariū. Plerique omnes Turcarum more non multum supellectilis habent, nec lectis plumis refertis vtuntur; at eorum loco culcitræ quasdam habent, ex tomento siue lana confectas. Omnes odio habent vinum aqua mixtum, & vsque in hunc diem antiquum propinandi morem obseruant, & præcipuè Creteneses: in eo autem differunt à Germanis, quod isti inuicem vrgent magnis culullis: Græci verò paruos haustus inuicem propinant: vnde vt olim antiquitus, ita & nunc Græci pro inebriari dicitur. Sed quia in bibendo certas quasdam leges seu cærimonias obseruant, easdem prætermittere nolimus. Primò vtuntur valde humilib. mensis, & bibunt per vices; nunquam ordinem prætermittentes, ita vt si quis extra ordinem, hoc est, antequam ad illum peruenisset bibendi ordo, vinum posceret, magnæ inciuilitatis haberetur. Et qui promptiss. est ad infundendum, poculum tenet, ceterisq; omnibus. solus per ordinem infundit. Vtuntur in istis compotationibus. paruo quodam vitro sine basi, aut pede, ita vt minimè è manu reponi liceat, illudq; omnino ebibunt, ne guttam quidem vini relinquentes. Interdum sese inuicem prouocant ad bibendum Germanorum more; & tum quidem amplectuntur se mutuò, manumq; alter alterius contrectat, illamq; osculatur, frontique admouet; deinde malas siue genas tam dextram quàm sinistram exosculantur, sed tunc non obseruant bibendi ordinem. Et quia fortiss. illud vinum paruis haustibus potitant, & inde valde incalescunt; semper cantharum aqua plenum præstò habent, & similiter magnos aque haustus ingurgitant, vt sese iterum refrigerarent: nam aliter haudquaquàm sitim sedare possent. Mulieres non adsunt illorum cômestationibus. Vetus ille mos ethnicorum deplorandi mortuos, etiam hodierno die per totam Græciam obseruatur, vt & in vicinis Regionibus. Quæ res valde est absurda. nam postquam aliquis vita defunctus est, mulieres certo quodam in loco conueniunt; & ab ipso summo manè vlulatum quendam ordiuntur, percutientes pectora, unguibus genas lacerantes, extrahentesque capillos, ita vt planè miserabile spectaculum exhibeant. Et vt melius hæc mysteria peragerentur, mulierem conducunt egregiè canoram, quæ ceteris præcmit, vt intermissiones (pauas vocant) & accentus huius Næniæ melius intelligerentur: atque in hoc planctu laudes, virtutesq; defuncti recitant, incipientes ab ipsius natiuitate, vsq; ad extremum eius halitum. &c. Hæc ex Petri Bellonij Obseru. lib. 1. transtulimus; vbi plura. Ex Veteribus hanc Regionem descripserunt Strabo; Mela; Sed omnium studiosissimè Pausanias. Ex Neotericis Nicol. Gerbelius; Wolfg. Lazius, qui citat etiam quendam Anton. Vrantium Episcop. Agriensem, vt qui eam peragravit, atq; eius descriptionem Recentioribusq; vocabulis propediem in lucem proferet. His adiungere licet Hugonis Fauolij; Hodæporicum Byzantinum; & N. Nicolai Obseru. Orientales; Andr. Theuetum; Pet. Bellonium. &c. Petrus Gyllius diligentiss. descripsit Bosphorū, & Urbem Constantinopolim.



Iacobo Castaldo Pede montano

GRÆCIAE
VNIVERSÆ
SECUNDVM
HODIERNVM
SITVM NEO-
TERICA DE-
SCRIPTIO.

Auctore.

Maris
Cura privilegio

Mediterranei

10 20 30 40 50 60 70 80 90 10 Mill. Italicæ

48 Meridies 49

